





原件短缺

P1-2



憶定翁謝政後日以詩騷自娛著述甚富而未盡梓行他先達稿存蠹蝨中者殆十之二命男年搜閱彙爲內集而以交遊縉紳姻家贈貽爲外集蓋以續葵園文會錄亦欲子侄知吾家先自有典刑居官



凜冰霜之操居鄉絕軒冕之跡庶  
幾不以掇青紫相釋云

萬曆庚戌歲長至日新都平盈

述庵方師臯書於坦蕩軒



久德堂內集目次

卷一

積善家訓序

執中齋

汲古集序

克正

刻太嶽志畧序

定庵

送內翰薇山朱先生還朝序

此襄毅公督木平番有功卒賜諡賜墓  
朱先生為治績畢還朝而定庵先生序  
其事以送之

送邑大夫夢鶴王公榮膺簡命序

賀蘭坡鄭翁六十序

自閑齋序

西峯

賀大叅程櫟峯六十序

亦愚



壽余母葉夫人七旬序

壽雪谷宗丈七十序

垂釣百詠序

律呂折衷序

花萼集序

世德編序

五鮑錄引

張公橋記

雙溪觀記

重建雙節堂記

獨冷齋吟草後語

跋會講百八箴

八仙會傳

琴銘 飛躍亭銘

居敬銘 窮理銘

胡氏烈節傳

祭工部尚書寒泉潘公文

祭兵部尚書簡肅潘樸溪文

祭外舅雪涯王公文

祭吏部尚書少原余公文

明谷

碧梧

聽泉

赤愚

述庵

定庵

衷素

定庵

澹軒

葵園

定庵

柳溪

三台

衷素



曾王父輝七公墓銘  
孺人墓銘  
亦愚

王父榮十公墓銘  
孺人墓銘

月山先兄墓銘

王泉濱先生石阡表  
成岡

庚叔源泉墓銘  
述庵

奉甘泉湛翁書  
時素

達楚畹金邑侯啓  
坦庵

達諸父兄書

劔浦祠堂上梁文  
朴庵

卷二

白石賦  
亦愚

月樵賦  
述庵

自述  
賡九日無菊  
鑑泉

題三閭大夫廟  
冬日課孫

狷峯先生以直諫歸田  
二首  
西峯

水月歌  
慵庵

雲衢發軔卷  
月溪卷

柳槿詞  
二首  
九日遣懷

過釣臺  
自君之出矣  
四首



芙蓉

耿

奉和九日遣懷二律

節庵

四言古詩 十五首

亦愚

五言古詩 八首

七言古詩 五首

五言律詩 六首

七言律詩 八首

五言絕句 四首

六言絕句 一首

七言絕句 五首

詞 二首

壽泉翁夫子八袞

時素

題東山

新春

過閔子廟有感

福山贈別 二首

春客王十岳隱園題紅梅

時文

苦雨 贈止觀上人

九日自郡城重訪王十岳

春仲七日紀年隱園

懷默照亭 秋訪汪湖隱

寄心印上人 王潭戲釣



次少乾遊石門庵韻

元宵翫燈

季泉

點周易有感

夢月宮

梅月圖

述庵

賀中翰兄誕辰

君周

祝鳳岐兄六旬

久德堂內集


新安平盈袁素方年彙輯

積善家訓序

執中齋

嘗謂人爲萬物之靈以其有仁義禮智之性也性發而爲情情無不善則性之本善可知已詩曰天生蒸民有物有則民之秉彝好是懿德孔子曰爲此詩者其知道乎正此意也但欲動情勝利害相攻乃有貿貿焉自喪厥初者噫可不戒哉聖人純乎善賢人復乎善衆人當勉乎善善而勉之勉而積之積之之久可以作聖賢裕後昆無愧于人道其利不亦溥乎余





原件短缺

P 2



中羅元季騷擾寓依香山外舅家迫我

朝聖明誕興治化聿新尋復故土而居之孳孳力殖  
惟以墜先業是懼猶慮後之人或惰于茲爰纂述古  
人善言善行凡數十條間竊斷以已意末以祭掃儀  
規附焉總目曰積善家訓俾我子孫世守之以善之  
當爲而必爲以不善之當戒而必不爲窮不失其身  
達則兼善斯世此則余之望也亦今日示訓之意也  
循則吉違則殃爲我子孫者益勉之而已矣其毋視  
空言而弗之念哉

郡志事實方振文尚質號執中齋婺源平盈人潛

汲古集序

克正

詩者心之聲也有所觸則鳴物之善觸者莫如風風  
之鳴也溫然而春燠然而夏悽然而秋冷然而冬風  
非有意于鳴也觸于物不得不鳴風之鳴非有意于  
變也遇其時不得不變故風者天下之至聲也三百  
篇之作雖婦人女子野歌巷謠類非館閣諸大手筆  
所能盡何也愈工愈竒則愈不勝也漢晉之興鳴者  
如蘇陶忠義之氣形于自然風韻猶古至唐盛時杜  
少陵以雄渾之才鳴而爲句律之學雖格調稍變乎  
前忠厚含蓄猶有風雅之音晚唐以降鳴斯下矣予



嘗評之三百篇不可尚已蘇陶如處子鉛粉弗施而  
態度閑雅少陵如命婦冠佩儼然望之者起敬晚唐  
則如商家女雖綽約婉婉雅少持重之意予自垂髫  
時先君子每爲予道里中先達如外翰王公節推呂  
公架閣周公暨予祖野齋公父子文行風節卓有可  
觀永樂丁亥架閣曾孫某館予族塾因得所謂汲古  
集者讀之意會成文自爲一家變華綉爲典則寓壯  
逸于冲古力脫晚唐之習糜珠璣芝躬執七筭于蘇  
陶諸公之側蓋能鳴其善鳴者也公諱正字仁甫號  
汲古以進士起家仕至架閣云

克正名月同治春秋中永樂乙酉科鄉試己丑中  
會試乙榜例受教職不就入國學而卒





原件短缺

p 5



處杜述者十有九首類爲五卷旣脫稿雖災木是懼  
質之少監李公曰雖然不可無刻也遂刻之

定庵名升字世猷治書中弘治甲子鄉試登嘉靖  
癸未姚涑榜進士歷官福建海道副使別號亦愚



8 送內翰薇山朱先生還朝序

定庵

嘉靖甲辰  
九廟成

詔罷役。方塘潘公還自楚。卒于家寢。當道以聞。

天子悼之。曰：天不憖遺一老矣哉！命諸有司議官議謚。議祭。墓如故事。命下。諸卿大夫及司其職者群議于朝。曰：潘某起家進士。一爲都御史。兩爲尚書。皆二品也。宜加太子太保。按謚法。因事有功曰襄。左傳殺敵致果爲毅。潘某撫督底績。是其襄也。削平諸番。是其毅也。宜謚襄毅。國家會典。凡京官三品以上官爲



治墳。潘某官階二品死于職任。宜遣官董其塋事。議上。天子可之。于是工部擇可使者。疏名以請。薇山朱君以名進士當行。至之日。旂旄央央。六轡如濡。既至。約之拯之。百堵皆作。父老有垂泣曰。國家禮儀如是。懦矣。四方來觀者。咸嘖嘖不離口曰。國家禮儀如是。懦夫弗立志矣乎。竣事將歸。嗣子知軒溫。守軒澄。出祖于郊。徵予言。予與方塘有管鮑之好。先致謝私。後更以賀。乃頓首再拜。言曰。方塘有道之士也。釋褐以來。外補者幾四十年。而卒不得一日立于朝。與天子相可否。進退天下之賢不肖。輿論惜之。得君之

重。山色增輝。敢不拜辱。君之來也。泛魚浦之汪洋。遡嚴瀨之泔泔。上攀芙蓉對鏡。撼高鳥之危巢。而下窺龍尾。鵠溪起潛龍之幽窟。以發其文思。自是媿韓柳。薄風騷。與天下爭勝負。綽如也。升敢不拜。是行也。見山川之紆曲焉。見閭閻之蕭條焉。見風俗之淳龐焉。剛吐柔茹。無不嘗焉。曩耻室罄。無不知焉。君之還而人也不爲御史。則爲給事。以言則切于情。以令則嚴夫實。雖張柳之風裁。賈誼之議論。以君爲之。裕如也。敢不重拜。君行矣。他日來使節。出按吾嶽。所以發方塘之幽德者。予竊有望焉。是爲序。



8 送邑大夫夢鶴王公榮膺簡命北上序

嘉靖戊申婺長官缺監司上其狀僉曰婺巖邑也且多巨室必得有風力者往銓部難其人久之漢陽王公服闋適至公昔治天長有聲衆咸屬意於公除書且下婺人走賀曰大夫其將行今之是鑒昔之非乎公曰弗惟其是弗惟其非天下之公是者是之公非者非之而已咸再拜曰持此以往婺人其瘳矣乎公始至於境婺人私相告語曰少年進士也必易其民或曰不然觀其狀如蒼鷹立於碧梧之上非軒楹可呼聽其言則如鳳凰麒麟武而不殺金玉君子也必



周於事既至，嫠人供張甚盛。醫醜之屬百，葵菹之屬百，餼牽之屬相屬於道。公一無所受，且下令禁焉。嫠多豪民，骹法文吏亂法。公曰：「是不可以爲理也。」搗四三人於庭，一邑帖然。嫠人又私相告語曰：「福星至矣。」先是吏茲土者，率避事兩造，具備經旬不問。貧者寄食於市，日仰米數合，弗得飽。儻券盈主人之橐，富者公私日積，不暇顧於其室。於是貧富俱困。公一日平獄數十訟者，魚貫而進，公立鞠之，折以片言。人皆引服，力不贍者，蠲其紙米，則躍而去。不裹糧，不儻居，朝出而暮還。人甚便之。政事之暇，坐空堂上，閱群案，或

時搖筆以對白雲。一庭闐然，獨涼風吹几，赫開颯颯。然嬾有人鳥，嚮下焉。蓋公之治民如庖丁之解牛，恢恢乎有遊刃之地矣。宐其閑雜如此，尤長於判訟者。俯伏階下，公據案疾書，若不經思而飛藻奪目。大或百餘言，小不下數十語。判案一出，人爭傳誦。嫠人又私相告語曰：「老吏不如也。」公始至鄉，大夫相率刺之。投刺將入，辭弗見。人有勸之者曰：「諸皆得言，如有不逞，則公危矣。」公曰：「有命吾知事，事而已。弗知其他，公遇諸上官，禮不加焉。人有勸之者曰：「銓部之注官也。視其考詎肯以最畀公乎？」公曰：「有命吾知事，事而已。」



弗知其他獻績將上行李既戒而簡命下矣婺人又  
私相告語曰公道其終氓乎將行程君某輩以書抵  
予曰大夫行有期矣其將何以爲別子宐有言乃作  
甘棠之歌曰有苑者棠其大蔽屏誰其植之君子之  
遺有苑者棠幽幽其色誰其似之君子之德維棠有  
花盈其梗矣維我有思路之永矣花之盈矣風雨被  
之路之永矣雲山蔽之君子有行言餞於湄君子有  
喜言觀其旂沉沉桂舟明月在朧鼓楫鳴橈  
天子有詔天子曰來汝汝爲給事大官爾膳青鎖入  
直天子曰來汝汝爲御史錫爾章服維繡維多行矣  
歌以送之

賀蘭坡鄭翁六十序

亦愚

歲在闕逢攝提貞於孟陬實爲蘭坡鄭翁懸弧之辰  
邑人謀將走賀大夫曰逖矣東土某敢邀寵諸君子  
以勤從者其以白吾大人可也于是韓生某復以書  
來曰雖然吾先子之所懷仰者也敢丐一言爲壽予  
未識翁能知大夫孔子曰魯無君子斯焉取斯賀翁  
有辭矣大夫守官如處子之守身守道如佛家之守  
戒曰馬則如羊金則如粟弗敢私焉予以是知翁之  
能不貪也大夫與人嘒嘒然溫言以陶之霽色以柔  
之訥者諛者狂失言者入而怖者窮無所援者咸使



得以盡其言予以是知翁之能用情也大夫之聽訟也左右視而訊焉判既定據案書牘尾卽麾之退挾私帖者立儀門外伸首一望竟背而走予以是知翁之能有執也大夫爲文章力追古作詩法李杜書法懷素盛鬚不同制要不失爲姬娃之珍予以是知翁之能績學也大夫蒞吾婺期月矣政是用成乃條所施行著之爲令費不省則賦促故受之節焉所以阜民也節必自近始故以身先之所以拔本也物不得其平則鳴而訟興焉訟不難于聽而難于得其情故樹之約長正副所以察隱也約長正副不能自立則

強有力者駕出其上且執之矣故擇言能服人者爲之所以抑暴也訟如張燈于室焉轉張則飛蛾轉密故人命無左驗者不聽田產管業五年以上者不聽所以鎮物也鬻祖墓者罪之鬻祭田者罪之所以哀死也人窮則俛而思仰而嘆潰焉而四出閉其門于富豪開其路於族屬所以調急也禁飯僧則髡首者髮矣禁開賭則游手者胼矣禁奪嗣則垂涎者退矣禁溺女則湛身者起矣所以正俗也窩隱有禁酌博有禁投獻有禁教唆有禁凡數十條皆切事體悉人情予受而讀之喟然曰沛矣哉洋洋乎炳炳乎司牧



者之龜鑑也哉予是以知翁之能訓子也夫令上有  
郡守有監司下有胥吏百姓里居一拂人意則鑄譙  
四集大夫之能事事如此得民心如此有夙譽如此  
其所陳列又復表表如此使翁聞之能不躍然以喜  
乎夫成大夫之德者翁也致翁之喜者大夫也二者  
互相成焉皆可賀也大夫行當晉位于

朝得以馳封麗眉皓髮錦衣繡裳交相輝映于蘭溪  
之上蘭溪之下其可賀也又當何如耶爲之賦南山  
之首桑扈之亂大夫起而再拜曰君辱以魯之所謂  
君子者寵予家君予竊有聞矣敢不拜君之辱于是  
乎又侈之以賦焉所以嘉之也敢不拜嘉南山言萬  
壽保長年也桑扈言萬福昭祿養也旣壽且榮光孰  
太焉敢不重拜



自閑齋序壽桂巖戴封君六句

西峯

桂巖戴封君以行誼隆于鄉有古長者風齋扁自閑  
志隱也人稱爲自閑翁尊之也維時週花甲壽琚序  
以侑觴申其頌也琚于翁爲甥故知翁稔且悉翁少  
承尊甫韶軒公教業于類旣而失所恃遂謀歸養或  
勸之起翁笑而不答時震器寶之先生方髻鬣矻有  
巨人志翁喜曰天意其在茲乎吾將有托焉長益績  
學以名進士中宏詞讀書中秘拜官給事籍籍有令  
聲

西峯名琚字世良別號葵園與狀元唐臯齊名



選較紫陽書院貢入太學中嘉靖乙酉順天府鄉  
試除興化府通判

○ 賀大參歷峯六十序

定庵

予少治書晚取詩三百十一篇讀之始飫我以南復  
飽我以雅終盈吾願焉于酌于武于般于那乃作而  
言曰詩之道淵乎邈哉讀其美如聽宮縣津津然喜  
溢于眉目之間矣讀其刺吻鳴色沮鼻息沸然不待  
終篇有變志矣歷峯程君以治詩鳴於時闕逢之歲  
君適當六十初度予之息珣君婿也古者有事于列  
國賦詩以見志敢以三百十一篇爲獻君之嗣伯父  
也待其有子而後去之君子謂其不忘孝也爲之賦  
黃鳥旣去而返其田廬綜其家焉教誨其子使觀成



于太學焉莖爲之賻祭爲之田焉君子謂其能知報也爲之賦木瓜程大姓也四時之祭行于私寢君曰是不可以訓也捐數百金建祠于南山之麓齋宿有所庖湏有所祀始祖有所棲群主有所君子謂其善居室也爲之賦斯干君兄弟三人孟諱某季諱某君還而入也其樂洩洩焉同其情欲其無相踰也聯其居欲其無相遠也君子謂其篤于親也爲之賦棠棣少保桂洲憲副方塘君同年也司徒東峯柱史覺山君同鄉也別駕時望民部仲復君同姓也與之上下其議論焉君子謂其能求友也爲之賦伐木君兩佐

郡辟曰獄訟當而已矣一司關政曰出納明而已矣及其刺洪都也三年而民誦之曰馬則如羊金則如粟君無私焉君子謂其獨賢勞也爲之賦北山君以長才大器阨于當道或曰相者舉肥盍載橐以往君曰諾旣而寂然人咸比之神龍黃鵠蓋得志則龍不得志則鵠君子謂其能守道也爲之賦桑柔吾聞之仁者壽仁者必有後君仁者也君子謂天之未始不爲人人之未始不爲天也爲之賦生民賦南山有臺升再拜曰志以昌言言以成賦仲甫作誦穆如清風昌言之謂也矢詩不多維以遂歌成賦之謂也志不



昌言言不成賦其誣也夫則吾豈敢

壽余母葉夫人七旬序

亦愚

方子既歸自閩將老焉亦愚之溪曰夫夫得志不得志爲龍焉爲蛇焉而已矣戴生文佐走予溪上以外王母廣昌夫人之壽屬予序之且致其外舅士修氏之言曰先君子獲私予方叔其言可據必有以請夫人者休葉巨室嬪于余爲廣昌君夫人

憲皇御極之長年辛卯歲四月十七日是其所生之辰也方子曰是固空言溪上之作落莫久矣雖然聞所聞言夫聞焉見所見言夫見焉聞見之間言將得矣予與廣昌君兪舉于甲子子邑之舉者五人鹿鳴之



預予與廣昌君獨同之五人者或聯登進士以去或就祿于學較之官太學之遊予與廣昌君又獨同之太學卒業歷事于都院君處貫城之西予處貫城之東辰而出申而歸予與廣昌君又獨同之是時儻居太平門閉之一室寢食共焉起居共焉廣昌君嘗語予曰自吾得吾婦閭以內閭以外政如畫一焉自吾婦之歸某之家無弗宐者問之于僕僕曰吾儕小人屬厭而已所聞如是廣昌君僑處于外歲時之饋無弗備焉行李之往來無弗戒焉且曰丈夫無內事努力功名無以家爲憂也所見如是廣昌君居官有惠政引民于恬置身于涼及歸圖書之外無長物夫人實相之諸子某諸孫某讀書爲文章有奇氣屈其時輩汝爲方進于春官隱然名動

京師夫人實訓之能事事賢也能相其夫賢也能訓其子若孫賢也皆可書也是日也有如麟之趾之公子焉有如麟之定之公姓焉綵服成焉觴則舉焉人曰能裕昆者德所基也是日也賓之筵秩秩焉千金稱焉萬年酬焉于是又重之以湛露之歌焉人曰能致客者名所召也傳曰西華至妙之氣化生金母女子得道者名錄之夫人其將得道乎是日也當有青



鳥之瑞

壽雪谷宗丈七十叙

明谷

櫪峯之東有大麓大麓之北有幽谷蟠神龍棲鳳舞  
蛟騰虎峙彌承其間余宗丈方公嘗遨遊焉時一陽  
潛淵六花吐瑞瓊瑤萬里大塊聿新山岳焉素其形  
松竹焉玉其翠鶯鸞焉收其調龜龍焉秘其圖上下  
烟霞左右花鳥焉韜其奇公契而樂之浩然嘆曰雪  
谷之遊奇矣哉華卷于根見吾心之太素焉陽復于  
淵見吾心之太質焉萬斂于渾見吾心之太一焉圖  
秘于隱見吾心之混沌焉暑往而寒來百巧千奇藏  
于不售見吾心之歸根復命焉是故冷焰迸騰玉壺



水清一色渾淪潔白無垠學士得之而卓其志貞烈  
得之而堅其操詩人得之而雅其情此蘇武之嚙游  
楊之立和靖之詠爲百代儒宗動清風于千古者也  
因號曰雪谷以見志也于是箴息存說大麓賦龍泉  
甘貧苦學崇禮睦宗義方訓子不倦以淑徒其有獲  
于雪谷者匪小小矣是月某日寔惟公七旬初度之  
辰黃髮某公之婿也狀公之美而祈余壽之余曰嘻  
夫雪瑞于冬凝而未融素而未華靜而未動乾之貞  
也是故雪于天而紫極玄雪于地而海嶽潛雪于人  
物而形色涓雪于身心而無爲率真堯舜之民今公  
也雪以澡心心以懋德德以基壽壽以詠雪公之壽  
其無涯哉乃爲頌而祝之曰雪以身伯夷貧雪鬢雪  
眉觀梅花跨鶴破雪登崑崙雪以心躡天根周情孔  
思水壺紫素琴無絃調更新雪以節古士烈耿耿嚙  
雪羨蘇公千古清風澄秋月瓊瑤碧漢耀吾人萬壽  
無疆重千春黃子再拜而起曰是可以祝公之壽矣  
遂拜而書之于明谷書館

明谷名瓘字時素受業湛甘泉先生講學樂道督  
學黃公推入鄉賢崇祀題曰正學







則以獨善其身無徃而非自得之地是故伊尹之耕  
莘以樂道也堯夫之樵漁以弄丸也皆自得也夫苟  
能樂堯舜之道則爲伊尹之耕莘可也能閑徃閑來  
以弄丸則爲堯夫之樵漁亦可也而况于垂釣乎夫  
是之謂高尚其事夫是之謂不食其魚夫是無媿于  
白沙桐江之垂釣也何也蓋其釣非釣魚之魚也釣  
吾心之魚而已矣世之人徒知釣魚之魚而不知釣  
吾心之魚是故笑白沙之衣巾而噴桐江之羊裘也  
於戲知羊裘不足以爲子陵而後可以語垂釣之道  
也已

天下萬世之魚其道固在茲矣虛菴子其母徒羊裘  
子陵而衣巾公甫也哉  
碧梧名純仁字時勉治書申嘉靖甲午鄉試鄖陽  
府同知



律呂折中序

碧梧

夫樂何爲者也聖人所制以致中和之具也其始也人心之稱發而爲聲氣之和則以人聲之和而被之八音之和其旣也以八音之和平天下之情以和天下之人之心是故心和則氣和氣和則形和而天地之和應者皆樂音之和爲之也然必本諸律呂何也蓋律呂候十二月之中氣則可以得天地之中聲而聲無不和夫然後以是中聲之和者被之八音而爲樂則極其中和聽之者自洋洋而盈耳矣入乎耳感乎心莫不中且和焉繇是中和之氣薰蒸宇宙則天



地自位萬物自育氣無不和四靈畢至夫豈小補云乎但古樂久亡三代而下及諸儒所論各爲異同大抵皆爲黃鍾九寸之文所誤自漢以後紛紛多鑿卒無定議梁隋以來累黍爲尺以制律而容受卒不能合下至王朴用尺定律而聲與器皆失之司馬遷以十爲寸法是也然其損益卒相抵牾京房則自仲呂以下轉生元始四十八律共爲六十律此無知而妄作者也章昭則謂黃鍾管長九寸徑三分圍九分則并空圍九分之義亦失之胡安定所謂九分方者近矣然所定之律不本於聲氣之元一取之秬黍且遷

就林鍾以下諸律圍徑以就黃鍾清聲何承天劉焯之徒譏京房之病又欲增林鍾以下十一律之分使至仲呂再生黃鍾還得十七萬七千一百四十七之數至蔡季通新書雖極其精密然強生六變律及半律半變之用吁亦勞且拙矣凡此皆黃鍾九寸之文誤之也且誤用三分損益隔八相生之文故其弊必相異同卒不能合律既律之長短參差不合則不能和聲可知然則又何以諧八聲而和神人也哉惟我朝李兩山所定元聲雖未知盡合古制而所論極爲有理想其規度氣象若制而用之必可以和聲而諧



樂樂和斯可以感人心之和而古人制作之精意亦  
可以得其餘韻矣不肖究心於此已二十餘年初得  
蔡西山新書讀之畧盡其蘊然所論皆不能無疑于  
心者數年而未敢以語人也及得兩山元聲之書讀  
之其言實先得我心之同然故深信而敬服之又究  
極於此者數年而又疑其五聲清濁之相抵牾乃至  
廢寢覃思而畧有得焉又復集古人論樂之遺言而  
考證之然後益信歸見之或似是故不逃僭竊之罪  
而折中之以告於同志及世之審音者焉

花萼集序

聽泉

花萼集潘惕然氏桃谷氏兄弟唱和詩也二公必有  
詩名風月之夕一唱一和積成一帙間以示予夫明  
良喜起賞花釣魚諸作君臣賡歌載在籍冊自詩人  
以來未有兄弟唱和如二公者也讀惕然詩如伯牙鼓  
琴按徽調軫妙生指下止乎其不可止倏然變入徵  
調嘈嘈切切如訴如慕讀之溫柔一家語諾得詩之  
所謂風讀桃谷之詩如商盤周誥初若聱牙讀之三  
四過但覺文妥旨順意味幽長淡得少陵家法而壯  
浪雄渾或時出入于昌黎諸公邕藉以下弗論也直



與風雅下上其議論耳予聞眉山三蘇草木焦枯潘氏兄弟之賢不下于眉大司馬樸溪公發解南畿元弟三人不城于眉不知樸溪諸山草木亦焦枯否或曰焦枯之論甚蘇氏也

聽泉名邦慶字以賢治書中嘉靖癸卯科鄉試登嘉靖庚戌唐汝楫榜進士歷任福建布政司叅政

世德編序

聽泉

傳稱立德立功立言爲三不朽而立德爲上立言又次之似岐德與言而二之者要之言非德則無以涵理趣而廣愛傳德非言則亦無以闡精蘊而垂永遠譬諸草木有根幹而枝葉華實蓋一體以相成焉舍枝葉華實而曰根幹能獨存也有是乎故德之所以能垂不朽而後世有述焉者賴言爲之傳也孔聖嘆杞宋無徵以文獻不足王國尚然况其他乎始祖自衢蘇庄爰宅於茲代有聞人然清修懿範每就湮微凡以典籍多散逸靡所寄焉以永其傳蓋有不勝其



追悼者矣我先伯祖克淵公集自十四世士秀公下  
追任毅公七世所撰內外詩文爲世德編其間出處  
之正作述之規詩禮之承節義之守繩繩繼繼歷今  
數百年一展卷而儀刑宛若在目焉揚子雲曰存則  
人亡則書因書以觀人因言以知德信如枝繁華茂  
而根榦之生意益以盤結堅固與愚固謂德之不朽  
言之不朽爲之也克淵公有光于先德也大矣公玄  
孫元勳以立續爲較讐刊刻之而以雙節堂集貞烈  
孝節序傳附焉其用心亦猶克淵公之心也彼治產  
者謹券曆居官者壹簿書求其考圖籍志藝文若世  
錄家乘用垂先德于不朽非象賢繼美者其孰能之  
夫高山之仰維桑之敬古人于鄉邑異族之賢尚景  
行而思齊焉况先世乎詩曰世德作求誦其言思紹  
其德期永光于是編者是在我後之人云



五鮑錄引

定庵

五鮑錄錄五姻家手柬也五姻家者石麟氏寒泉氏  
碧峯氏方塘氏歷峯氏也五姻家知我者也有鮑叔  
之風焉弘治丙辰予與石麟寒泉方塘受書于葵園  
聚首理源硯席同也觴節同也竒文共欣賞而疑義  
相與析也相得甚懽握手之餘約爲婚姻正德丙子  
歷峯同舟北上亦如石麟諸公之于理源也既而予  
之女嬪于潘爲石麟子婦歷峯甥予長子翊寒泉甥  
予仲子瑞置之貳室各如約嘉靖甲辰方塘歸自楚  
寢疾于家將屬纊呼二子暨其室老日某與某有宿



約負負柰何指孫女曰必以歸方氏于是予幼孫仲  
遺遂壻公之子督府守軒碧峯弘治丁巳與予同試  
入邑庠明年公掇科以去自是燕鴻背馳嘉靖丁未  
除夕前三日公飯于高沙逆旅予適過之呼與共食  
將別公起長吁曰吾不得與君爲親家矣予竊怪之  
恐其言爲讖也未幾果以訃聞公沒後公之子鄉進  
士慶原始以女許予孫仲譙子師光嗚呼人事不齊  
五人者不可復作矣爲之泫然出涕暇日檢書篋中  
手柬遺亡者殆十八九乃手自搜錄萃爲一册刻置  
鳴陽山堂俾子孫得以世講云

張公橋記

定庵

皇帝御極之三十年上谷張公以司諫謫來于婺予  
往候之將弛擔市人傳呼公出予從壁間竊窺公據  
與端坐目不旁遊清朗之標瀟散之韻望之若墀鶴  
崖鷹隱然有摩霄抉雲之態曰枳棘非所棲也明日  
投刺請見公延予于堂問朝廷處分館閣諸大臣起  
居狀不荅問往者北虜之深入邊防堅脆何如曰太  
平忘戰耳餘論侃侃大抵不負

天子不負所學曰落落者其難合乎退而論之邑人  
曰公來數月矣費皆取之宮中有饋遺者則澁拒之



楮米之罰無私焉其德操有如此者自公之來兵隸  
不敢下于鄉吏受賍者舞文者側足而立訊獄于庭  
皆發摘其奸伏庭無滯獄邑無冤民其才諳有如此  
者予不覺抵掌大呼曰公胡爲乎來哉公胡爲乎來  
哉有扼腕于座者曰公何疑于是二之多譽四之多  
懼易教也公奮噬肺之勇以履饞虎之尾無金車之  
援而有豐蔀之厄其突其焚勢則然也進而爲朕之  
上則遇雨矣脫孤矣匪寇婚媾矣公聞而嘆曰謫吾  
分耳婆環水而歸舊有五橋橋之衰盡水而止沙行  
數十百步石躡其足水小至則沙伏沉不可上公率

邑人易腐以新東橋自南岸訖于北岸西橋自北岸  
訖于南岸人稱其便北門橋久廢或有急召對岸不  
相及迂從東橋始得達公悉捐已俸馬隸之入創爲  
北橋買田以備修葺越渠鄭公甫至相與贊之雅守  
張君全國子上舍王敏江東暨北門之哲某某相與  
助之落成于某月某日名之曰張公橋某輩復爲亭  
于橋之南立石紀焉以言屬予予曰公之德在人如  
水行地一橋豈足以盡公哉昔狄梁公調汴州闢並  
本有滄海遺珠之嘆未幾入爲宰相元微之謫江陵  
白樂天謂不快者乘其便相噪嗷焉未幾入爲尚書



左丞行見公之人也茲橋也其爲周公之袞乎召伯之棠乎東國之人見袞而喜南國之人見棠而慕則橋與田與亭非徒爲也公諱某字某以進士起家云

雙溪觀記

述庵

在昔先墓多遠或菴觀置其旁敦孝也緣時致祭崇禮也然禮有以遠爲貴者古官師祭于廟庶人于寢遠則就墓祭以代廟寢防不虞也予平盈原本篁墩四世祖唐旺公仕唐有功封留隍大將繇開蘇庄是爲葵派鼻祖墓旁置觀以雙溪環其前遂名焉觀宇森嚴繇宋迄元弗替予先達定庵柳溪聽泉諸公後先遺奠用伸孝思嗣宦遊日久觀被凌侵賴王父別駕朴菴公爲之一清矣迨予承乏永昌聞觀復逼侵漁因致政歸與父老約毅爲興復計賴宗兄以孝竭



厥周旋卒以誠動而匡復不勞遺力遂鳩集營整卽  
其故而葺新之蓋先世之靈默加相助而觀與墓自  
是永不朽矣顧觀原立供懺舊有規畫茲欲復厥舊  
則羽流貧弗克勝欲中輟弗舉則祀禮尤不可缺予  
父三台公捐貲置田若干畝額爲圭田凡任持禮神  
祀先胥此焉資但葵與先墓遙隔而藉庄宗人值丁  
季運苟弗緣時省奠懼後之視今亦猶今之視昔已  
遂酌疏數以三歲重九舉二人來此致奠羊一豕一  
祭儀夫費俱備自前田其稅糧入觀戶輸納而田畝  
租額山場四至列于記外僉勒諸石用垂不朽庶田  
可以世守而是觀巋然有光于昔乎凡爲子孫者觀  
記而興思知茲墓爲某祖衣冠藏也茲觀爲護墓所  
當保也遡水源而披木榦則尊祖敬宗之存必有以  
繩厥祖武勿替引之者矣遂詮次其事爲雙溪觀記  
述庵名師臯字子謨治書貢入太學授汝寧府通  
判補任永昌府 贈承德郎



重建雙節堂記

定庵

雙節祠者祀胡鄭二母也我高叔王父炯十七府君以茂才辟爲贛州司稅遂卒于贛曾叔王父輝九府君扶襯以歸未幾亦卒焉遺孤纔生三月則我伯王父榮四府君也是時方氏蓋岌岌矣外無期功之親內無綱紀之僕執牘筆以書者恒假手焉宮中之出入盈縮漫無所稽倚釜餽而待爨者徃徃如是亡聊之狀人所不堪二母身當其厄姑婦相吊形魂僅屬而能以十指之柔挈方氏欲絕欲落之緒置之機軸之上其清操足以勵霜雪其剛腸足以斷金石卒之



遺孤羽翼旣成翻雲扶漢而方復大興揆星星之火于寒灰之中吹而燃之二母之力也鄉人咸嘖嘖曰賢哉二母縣上其事于郡郡上之兩院兩院以聞天子下其章而鄭母以節獲旌焉胡母年不應例遵時制也先是雙節有堂弘治庚戌燬于回祿迺與竈雷諸祀並棲于堂北承塵之上諸孫群相與議曰弗稱各捐私鏹買地一區于堂之南搜考羸羨益之以群從之所輸度勢鳩材執事惟謹木石之工會于祠下祠成于是二母始得專祀堂宇儼然臨乎通衢過者莫不起敬焉謹按方氏遷自衢之蘇庄五六百年數節稱者獨見二母厥後弘治間則諱細璋者我伯父鏞之女貞烈尤異程學士篁墩先生編集新安文獻斷自成化以上獨變例搜入附于雙節傳之後今嘉靖則胡氏日迎瑞者我族姪櫨之妻復以節旌于朝二母之裔孫蓋聞二母而興起者皆可書也



獨冷齋吟草後語

衷素

張天覺云自予學佛而後知儒真不誑語吾師在衡  
先生則云自予學儒而後知佛真無綺語夫天覺學  
佛知儒而吾師學儒知佛佛與儒果且有二乎哉今  
畢東老又云道一而已儒者見之謂之儒宗強名曰  
助道具品禪者見之謂之禪宗強名曰無綺語品然  
則謂儒謂禪皆從見生而強分辨者也道術幾爲天  
下裂矣蓋吾師嘗語小子年曰此事須從肺腑中流  
出蓋天蓋地始得原夫參求之久鮮會之深橫口所  
言罔匪證曷言言儒也而不知佛解之有以異言言



佛也而不知儒理之有以辨總之宣說自己以待夫  
人之領取何如耳年下下根鳥足當上上機但就冷  
齋吟草依語依義而諷誦唱嘆之有不覺豁然躍然  
若聆鐸音而諦梵唄也遂請次之以付劄劄氏  
衷素各年字若孺治書繇廩例授中書舍人

跋會講百八箴

衷素

吾師問石先生其學多家其參訪遍鄉國天下所爲  
發難文筵之上蓋數數已至于輓近卽邑季會與六  
邑大會曾不一起者人盡疑焉而小子年亦間有請  
也先生曰嘻予敢非薄夫講學者哉易有之君子以  
朋友講習夫講爲習設也講而不習猶無講也子不  
云時習又不云朋來唯是習以來朋朋以其習而後  
乃今愚者魯者辟者嘖者億中者屢空者靡不習焉  
以各得其性之所近而講在其中矣是故終日與言  
講也各言爾志講也雅言講也罕言講也無言亦講



也乃三千七十之徒斷斷洙泗間而獨稱顏子爲不  
惰者豈非以習哉唯其習也講之而愈明也唯其講  
也習之而卽悖也今之群聚而講者其有當于習乎  
其無當于習乎予不預講久矣而往有會講箴言行  
于世子試誦之當知予非病講病夫講墮于習以習  
墮而爲講者垢厲也年唯唯于是受而卒業忽爽然  
曰講在是習亦在是善哉吾師之不爲說鈴也因重  
刻之以訂諸吾黨云

### 八仙會傳

八仙者何方姓乎盈人也會者何盟同庚也人也而  
仙名何志似也成化戊戌群從同生者歲得七人焉  
曰常世因以孟夏曰用章世懷以仲夏曰厚世淳以  
季夏曰簡時槩暨升世猷以仲秋日貌世威以季秋  
曰天瑞時徵以仲冬與世因內子潘而八丁巳之春  
會于世因宅世因曰茲會當何名升曰其八仙乎不  
四不六九九則浮三五之際得七爲儔有婦人焉其  
數適周天上人間相與同流言未旣時徵搖首掉臂  
突而前曰聞鐵拐李吟蹕善舞瑞請當之世因曰吾



洞賓也吾婦當爲仙姑夫婦舉案梁孟豈足多哉世  
懷曰吾願鬚眉長白如張果老世淳曰吾藍采和也  
世威曰吾曹國舅也時槩曰吾韓湘子也升曰諸君  
少鍾離耶風流儒雅真吾師耳世因遂呼劍而舞餘  
各作諸仙狀如今世所臨者有乞人立于廡下熟視  
嘖嘖乃按拍而歌八仙節之以截竹之鼓每歌一仙  
則指所與者而笑閉目頓足極諸歡態殊可聽也賞  
之以酒肉使復歌之各以次就坐時槩時徵坐于旁  
更相勸酬已而遁起爲世因壽世因醉從榻下卧升  
扶其首曰洞賓仙君昔三醉岳陽何如今日尚能朗

吟乎世因笑而起吟曰三盞五盞花下頻欲醒未醒  
酒半醺人生燈影苦無奈長笑起來雲滿村賦酒如  
灑曰酒清清兮發如灑兮灑則有畔君子飲酒曷云  
旦旦旦復旦兮永以爲繁兮酒灑灑兮來如江兮江  
則有步君子飲酒曷云暮暮暮復暮兮永以不誤兮  
世懷賦南山裂曰南山裂未及趾東海乾不到底天  
地不壞人不死二萬八千纔屈指屈指開花與落花  
秋風未掃春風賒左携子晉右洪崖彭鏗李耳休前  
誇君不見長夜漫漫今未半賓筵滾滾傾流霞世淳  
賦紫芝曰翳翳紫芝言采其苗薄暮從之豺虎正驕



困休我廬饑啄我黍重我醉歌飄然仙侶升賦美人  
日有美人兮嬋媛抱幽獨兮山前卜良辰兮開宴考  
初度兮紀年問今夕兮何夕春風起兮拍拍鶉光發  
兮明樓山礬爛兮照席方鳴儔兮東村復召予兮西  
隣賓盈盈兮既集盍將把兮芳樽闐頻送兮隔座盧  
爭呼兮遶屋酒力微兮須扶盃行亂兮愈促殘樽移  
兮花陰列炬迎兮候門情顛倒兮未極心恍惚兮不  
禁世威賦折柳曰折柳折柳芽大如秬樽前亂唱黃  
金縷醉來拋石打烏鴉枝上黃鸝飛欲語黃鸝飛語  
臨大屋屋下美人理清曲鶯鶯柳柳自春風神仙有

數誰當續時槩賦雪擁前日雪擁前雲橫後昌黎老  
翁空迴首頃刻開花逡巡酒此事莫須有時徵賦貂  
不足曰賓筵之賦貂不足小子當前試一續天星爛  
爛夜如何跋來還舞醉還歌酒酣擊案呼五白南風  
不兢子半黑左手持杯直至顛右手持盤更一擲盤  
中轉躍雙犢走眼花不辨丹與黝崛強樽前猶力爭  
觸檠欲倒長被肘柳眠棠睡吹未醒榻邊時作鼾鼻  
鳴大珠小珠汗流額臙脂濕面春風腥主人開瓶續  
牛炙對之不能三嘆息蜂顛蝶倒興未闌作勢東風  
還相惜東風遶袂柘枝斜函中折簡來西家西家那



得八仙案泛泛溪頭楊柳花轉眼春宵驚逝水隣鷄  
忽聽踈簷裏月影初低鷓尾寒漏痕半落虬腰起十  
年只今一醉同須拚此夜殊匆匆各言頭白不相棄  
綠樽長對春花紅蹇予支離恨偏成咏隨鸞鳳願已  
盈縱非仙才亦磊落愧乏健步能縱橫閑來扶杖穿  
園李開軒便擬讀書子鶴長何喜鳧何悲高材疾足  
多枉死君不見防風氏節專車期會不至甘受誅又  
不見孫武子別兩足指揮軍事龐涓戮詩各別裁指  
人人殊或述賓飲或咏仙跡蓋初未限以體也時漏  
下三鼓矣潘方治厨促華饌未已戒女奴傳語于席

曰我婦人也不敢預于歌咏之事斗酒藏之久矣無  
他也盡之而已衆唯唯連三大嚼世因取各盞滴餘  
瀝盤中曰諸君子加惠予夫婦至矣毋留殘焉以爲  
主人羞飲以巨觥遂各大醉唾地候者偵知之入曳  
以歸是會也傳之好事者以爲內不遺所親外不濫  
非類八人之中有潘以爲仙姑有時徵以爲鐵拐真  
奇遇也越十年丁卯升復班南雍舟旋次赤灘葵翁  
率僮遊作醜暢飲達旦庶幾一時之雅而同會諸君  
不在席矣又十年丁丑先安人新喪方哀毀中念不  
及此又十年丁亥作宰東嘉先一夕府符下清戎當



以明日按郡鼓下祭先祖畢改服登舟是日暴風大作泊一小渚兩岸淖深數尺不得登闕闕閉舟中一夜暨今三十有一年翻理往事乃追爲之傳

琴銘

澹軒

龍溪之上銀水之濱霹靂之餘頽然獨存旣仆而枯偃卧道右歷宋而元經年弗售南隱得之裁而爲琴翼然其形琅然其音爲之者誰古黠高氏弘治紀元歲次甲子

飛躍亭銘

有覺者亭池前林却仰睇鳶飛俯臨魚躍鳶飛則天魚躍則淵卑高以陳上下察焉亭之未基心領其要亭之旣設目契其妙心目兩失是曰玄玄玄之又玄誰識其然萬物散殊推之皆準子思有言道費而隱



澹軒文豹字元韜隱居課子若孫舟舟俱登進士  
瓏貢入太學學者稱南隱先生贈太僕寺丞

居敬銘

葵園

惟精惟一肇於虞廷厥法伊何而曰惺惺塞彼外蠹  
尊我主翁敬之敬之日新其功功匪爲人所以立本  
顏子心齋學者之準

窮理銘

萬物散殊各具一理卽其當然與其所以溘溘天機  
觸焉斯感表裏洞然乾坤一覽學匪矜驚所繇致知  
周子太極卓哉我師

胡氏烈節傳

定庵

烈婦方氏者胡亨華之妻也初亨華病骨熱且死烈  
婦歸有期矣亨華家言狀且曰墓木拱矣幸別爲計  
烈婦聞之蹙然曰六禮既定妾成胡家婦何所逃於  
天地如期捲室以行亨華卧床者數月烈婦旦夕照  
沫無倦色未幾而亨華卒烈婦年方二十夜撫其棺  
晝營其葬事焉爲墓於里之某原旁穿一壙人怪問  
其故烈婦不荅兄弟數呼其歸烈婦許之反其券鑰  
以携之爲之約期以堅之兄弟乃緩其呼一日以酒  
奠奠於墓告以相從之意歸戒其婢曰吾倦且就卧



汝紡於戶外稍息吾卽起捶汝蓋欲亂縊聲也遂自縊於床死矣死之日有村婦經墓所見亨華立墓前婦驚走亨華追謂之曰勿怖也一事煩汝幸語某娘子速來第如言以往其家當酬汝以布被村婦至門聞哭聲且告以故舉室駭嘆烈婦幼有至性父鎬早卒諸從兄弟營墓地獨斥焉烈婦扶其父棺厝之于墓身伏其上諸從曳之百計不得出烈婦呼曰萬段從汝棺不可移也卒葬其父烈婦名細珍於予爲兄予聞之先子太僕君云

祭工部尚書寒泉潘公文

定庵

天不憖遺公則已矣營左星飛座隅鵬止執友淪喪予將疇依牙琴屢歇穉榻空持憶昔理源受業西峯一觴一鉢飲啄則同冰硯同晨雨檠同夕奇文同賞疑義同析丁巳臺選同入于庠甲子省試同舉于鄉爾我忘形二人一屐握手論心肺腑相示公時聯登我獨南旋公酌于邸贈之以鞭酌以固交鞭以作氣公曰勉之母隳爾志朋友之義重以婚姻豚犬何幸獲接龍門議姻之初毀言日至公以書來數對以意讒間多疑釁開不密維汝與予維膠維漆癸未叨第



公歸在費中夜有聞達旦不寐東嘉竊祿公爲監司  
二天之庇公慰我私南行過公公病乍起寒暄之餘  
兼詢動履公曰咄咄日惟持糜昨者對客酒力亦微  
雨餘新霽行李在道儔侶前發取別草草舟回于杭  
夜聞召醫海川登岸聞訃且疑疇昔之夜夢寐如見  
倏爾一覺淚下如霰群蠅蔽天公戢其翼解組城東  
井渫不食馮屏大樹皓歌擘芝几几姻易汪汪憲陂  
幾秉蕃哲睿隣回炤孔無不可江湖廊廟釋褐筮仕  
戶曹首銓漳郡出守山海息肩風裁歷歷于浙于洪  
撫治襄漢川陝雲從大理簡命司平白下秋官讞獄

晉貳司馬兩廣瀕海諸蕃竊乘

帝曰咨且汝兼中丞安南問罪公力爭之曰無上事  
空費不貲維時毛卿仗劍總戎弗悅公語師老無功  
夏相當國一刺生隙置之留都忍遂下石公累乞身  
卧病江涘毛卒除名夏亦論死人生好醜定于蓋棺  
得正而斃名全節完正直之氣萃爲英靈不耗以散  
終復熒熒聖則爲說上騎箕尾仙則爲喬跨鶴緱氏  
形骸變幻爲鳳爲龍魂氣超忽爲雨爲風豈若伊人  
草木同腐或落坑塹螻蟻爲伍嗚呼泉翁而止于斯  
老成凋謝士林失師公福翁如萬瀑歸渤公名炳如



中天行日，跨竈有子，筮羽如鵠，繩武有孫，蘭苗于園，公所歎者，什百而一，忠蔽于讒，行牽于物，瑞黍半子，貳室久塵，三甥入侍，笑笑目存，尚書家物，宜如發篋，七歲不遷，輿情未愜，蓋公所能，公力以爲，公所不能，天實爲之，卜日庚午，祖送于野，薤歌載塗，飛洩隨輅，天子是悼，瘞公有墳。

天子是悼，誅公有文，賻之以錢，以助操築，贈之以官，以易耳目，束縛以去，亦得歸岡，寵嘉有耀，泉壤之光，升也駿奔，屢仰脅息，復覲無繇，使我心惻，有酒莫御，有言莫應，茫然相對，天地冥冥。

祭太子少保兵部尚書樸溪潘公文 柳溪

嗚呼樸兄，公竟不可起耶。三綱九疇，日就淪斃，望公起而扶之，邊陲多警，兵懦將驕，望公起而靖之，浮議沸山，偃矩改鑿，望公起而籌之，無藝之征，重瘡繁癥，望公起而罷之，群力就憊，野清室空，望公起而甦之，澆風相沿，世變愈下，望公起而障之，士習弗端，圉狃放逸，望公起而招之，嗚呼樸兄，公竟不可起耶。公之種種者，未及于衰力，可以一起矣。公之冉冉者，未至于頽年，可以一起矣。公視今之時，何時也。

天子焦然于上，公卿百執事，惴然于下，時可以一起。



矣。嗚呼樸兄公竟不可起耶。蓋今之相者舉肥此公之所以不欲起也。力弱媒拙導言不固此公之所以不能起也。天下之事不如意者十常八九。撥充幃佩荃蕙化茅此公之所以偃焉息焉無心于復起也。嗚呼樸兄公竟不可起耶。公方弱冠發解南畿祖父之所醞釀兄弟之所研鑽淵源有自不可誣也。其宰樂清也。如文翁之治蜀與學較敦禮義溺女有訓遊手有戒。祧東嶽而祀梅溪崇正黜邪浙東之民至今猶能言之。督學于閩誦帖爲之一變。宣政于滬南人不復言反。晉而貳冢宰則選法以清。晉而陟司徒則浮

費以省。及其出而南遷別歷四部政如畫一。闕丘之賊東竄其首海上之寇南視其魄。言者忌其太著疏入而公歸矣。人皆唁公而更以賀而不知公之憂正在此而不在彼也。一夕九逝營營至曙舟有以識公之心矣。兩楹夢奠哲人萎矣。嗚呼樸兄公竟不可起耶。舟不肖侍公有年矣。舟之母公之姨也。豚犬何幸獲館貳室情之所鍾正在我輩。昔人謂上爲天下哭下以哭吾私者不知舟又何如其哭也。邇者舟病弱子諄亦病一尊致奠匍匐莫前臨風長嘆淚落如雨。嗚呼哀哉尚饗。



柳溪名舟字時濟治書中嘉靖乙酉鄉試登己丑  
羅洪先榜進士歷官長蘆都轉運使

祭外舅雪涯王公文

三台

嗚呼輜車既啓駿駿逝而揚靈未極魂氣何之誥之  
不肖悵恨于茲公乎且止聽誥陳詞視公之髮皤然  
尚稀視公之貌渥如凝脂公福未艾公年未頽公有  
田園可以棲遲公有池亭可以樂饑乘龍令子祿養  
可跂晚留不死之舊鄉以遨以嬉公何釋此而不爲  
哉承塵鵬止華表鶴歸公則逝矣胡淹忽之若斯昔  
者之來我笑我携今者之來弗聞弗知悼遺愛之猶  
在悔承歡之未涯九原不作相見無期翻理往事安  
得不破涕而興悲嗚呼生伏隆中之鳳死騎天上之



箕公之始終誥復何疑公之志繫繫皓芝公之量注  
汪憲陂冥飛恣弋鴻之遠飲啄得梁雉之時明易之  
道習坎繼離緣聃之術知雄守雌公之盛德固當有  
鄉評如月旦者哀毀之餘豈復能殫述而盡披嗚呼  
公弗留矣誥從此辭憑棺一哭有淚如泚嗚呼哀哉  
尚饗

三台名仲誥字以周孝友天植仁惻淵涵置祠田  
撫孽弟賑貧乏治津塗有司屢請賓飲不赴封徵  
仕郎

祭吏部尚書少原余公文

袁素

嗚呼先生豪傑之才剛大之氣眼界空濶嘗俯視乎  
塵寰見識圓明每構思乎天際析經傳之精微辨朱  
陸之同異衍派洛川窮源洙泗學則醇儒出爲名世  
調琴花縣豈徒野雉之馴簪筆蘭臺不獨路驄之避  
敢諫犯顏諤諤奏議向秦關而攬轡激濁揚清與大  
計以掄材舉幽拔滯時爲廷尉執三尺而刑以平時  
爲總戎稔六韜而師知奮遵

祖制以抑權璫之倖封斷房山以銷奴孽之焰勢尚  
有運籌耿耿未試民望咸歸天曹攸寄懼處高而身



危蚤見幾而避位更值東林之厄已知天地之間寡  
欲養心題吟適志碩果不食彼蒼留意幸

聖主之當陽誠千載之奇遇思特起夫高賢亦廣搜  
夫善類識脫龍蛇假以年歲進而啓沃於

朝廷有裨建彼勲猷於 國家有濟矧我一邑關係  
匪細慮饒河南賈之不通欲設官疏利而革弊方期

皎月麗天胡乃大星墜地然芳聲播在  
四朝且公論出于多士純孝有如嗣君善繼志而述

事得交章以陳請依典禮以塋祭并此  
鴻恩沾及元配秉巨筆有名公行義勒諸墓誌古三

不朽先生兼備年辱在葭葦夙叨履庇瞻儀範藹乎  
肅雝聆箴規佩其篤摯以道義而相期合終始如一

致哲人逝矣後來誰繼喪斯道之主盟為天下而垂  
淚陳此蕪詞難達未盡之情薦此溪毛聊侑有從之

涕神之格兮少留于是方歆  
御醞之天漿盍鑒淡交之風味尚饗



魯王父輝七公犬眠墓銘

亦愚

犬狂則獠犬爭則噬時維太平爾犬則聒嗚呼千秋萬歲母使龐也吠

魯王母輝七孺人月山墓銘

範溪之口佛岑之側其形偃月望如半璧此我魯王母之玄宅

王父榮十公張坑墓銘

君子曰仁者必有後乎我魯王父之棄諸孤也我王父之熒熒禳祿也方氏蓋岌岌矣而卒復中興觀我王父可以知仁矣王父諱道同字思達榮十其行也



生永樂壬辰六月沒成化戊子三月塋張坑麻榨原  
左祔以伯父諱文烜右祔以季父諱文潤先君嘗語  
升曰王父之行如騶虞之不殺昭然太平之瑞識者  
以爲仁溫良善士也伯父之行如蒼鷹立于高梧之  
上其勢非將爲搏擊者而狐兔自爲之辟易英邁人  
豪也季父之行如隼集于堂而軒楹顧盼常有飛揚  
之意篤守君子也爲之銘銘曰舍而蒙茸棄而旃幪  
高山之下龍蛇蟄焉嗚呼公永以爲宮

王母榮十孺人龍槎墓銘

龍之披披石之神神匪墳也穀維母之淑龍之幕幕  
石之歷歷匪墳也臧維母之良伯也其東嘉福攸同  
叔也其西德音不携孫子楚楚原田膺膺百世之下  
歸之于母

先兄月山府君墓銘

戊子冬升宿太僕之署夜夢僕以衰置床下惡之明  
日從子舟上春官道滁始以伯兄月山先生之訃訃  
于太僕且驚且疑曰天遽奪我兄耶門戶衰矣不覺  
號眺以哭太圉今少司徒顧亞圉今中丞王藩伯徐  
郡伯楊暨州楊之長咸來弔之曰天不憖遺哀哉公  
諱勤字世政方嬰兒時多疾太僕君安人甚鍾念之



暨長游于鄉較聰敏絕人書讀三四過卽成誦塾師  
授之句讀點有誤公輒正之塾師愕曰是兒昔日必  
亢宗矣其岐嶷有如此者甥于陳陳館甥于門下見  
其恂恂體若不勝衣甚悔陳適有喪事日畜數百人  
公爲之督其怠事者鞭其爲竊者始而譁中而翁以  
定陳喜曰乘龍之標門楣之光也其才諳有如此者  
太僕君年未五十委家政于公公撫二弟以恩錢粟  
出入不令有匱乏衣襪之在施者楮幣之在筭者率  
與之共其友于有如此者里大家有所貸必計產而  
爲之可否公獨不然至或不索其券昔負公本暨有  
仇于公復來貸見公慙曰負負公竟與之不較也其  
僮儻有如此者治院于佛嶺之汪中爲坊堂下鑿二  
池環以石闌堂後二方池字金魚百十頭池上爲臺  
引東塲之泉屬之其風致有如此者公生成化己丑  
歿嘉靖戊子配陳繼王繼張陳王先公卒公遺命合  
葬月山之原子四長國子生瓏次淮府良醫正珞次  
瑀次琉璃受室而天珞次子仲說後之銘曰晝偃于  
宮夜遊于池魂氣無不之也嗚呼魂氣無不之也



王泉濱先生石阡表

成岡

余嘗讀詩至涓陽未嘗不泫然而出涕也悲夫地維  
摧折蚤罹疾疫暨長有知識思欲一罄音馨弗可得  
廼詢諸大人則謂藩曰兒有陟屺之思乎爾毋懼然  
清婉不作婦人煦煦態視爾舅泉濱可藩也識之時  
見舅氏如見母焉未數年泉濱先生卒其仲子份早  
入芹宮昕夕與余相切磋藩也賴之時見舅氏之子  
如見舅焉嗚呼九原弗作乘黃莫展間與大人屈指  
天人之交好謙惡盈天命弗僭厚殖薄收神秘其藏  
自古善行之士未必不嗇於其躬而狹中窄幅輩乃



欲以一握登壘斷其茂明命叢衆怨卽嘉穗盈畝屢  
獲豐年一旦溘先朝露天亦從而厭絕之矣視先生  
泊然自守以貽不斬之澤何啻相什伯也先生幼充  
博士弟子員居恒韜晦不逐塵而奔惟以勤儉耕稼  
訓其子曰吾無以庇後惟願爾曹孝弟力田世守古  
人淳朴風噫嘻是訓也豈獨垂休王氏哉誦舅訓思  
母儀藩將百世守之未艾也爰是含哀拭淚次其大  
以表于石阡

成岡名維藩治書中嘉靖甲子鄉試任邵武府通  
判

庚叔源泉府君墓銘

述庵

昔嘉靖癸亥予甲午同庚者聚族凡十五人華筵綺  
席志氣洋洋宛若仙會瓊宴也迨癸巳適當花甲之  
期而十五人者僅存其七公戲語予曰昔定庵公爲  
同生七人作八仙傳幾逾百年尚膾炙人口吾輩猶  
堪媿美子今之定庵也盍續八仙傳可乎余應之曰  
定庵公文章政事超卓一時故其文信今傳後當時  
諸老亦與有光余何敢企前人縱不以無文自愧寧  
不重貽諸公差於是每筵持觴廢和不醉無歸回視  
仙傳紀錄曾不多讓無何公抱疾調攝卒弗起余聞



駭慟淡恨奪公之速若天斬予也今季秋月日仲子  
五瑞築壙于芳嶺之原來索予言爲誌余思公之先  
世有厚德迨公克修前業儉勤孝友念兄子之弗給  
不惜捐貲視友死之無歸卽爲殯歛他如繕橋路佈  
藥劑懿行殆難枚舉至于庭訓義方動以陰德裕後  
爲勗尤卓乎貽謀之遠余雖未獲作唐傳以躋公于  
仙侶猶欲紀碑銘以表公于身後俾公之孫子式承  
先德將世世其無斁也公諱子頊享年六十有一配  
考川胡氏子二銘曰絜惟我公器度謙冲壽躋花甲  
福享考終卜茲善地山廻氣鍾千斯萬年蔭庇無窮

奉甘泉師翁書

明谷

看來寂然不動之體瑩徹于宇宙之間宇宙之至靜  
卽吾心之至靜而天下之千變萬化聲聲色色不過  
至靜中數點之動而已至靜瑩徹上下四方廓然萬  
里見父而愛見子而慈兄觸而恭弟至而友花柳風  
月源源而來如泉之涓涓生于沼而未嘗撓于沼如  
雲之縹緲行于空而未嘗擾于空故自一念之動以  
至千酬萬應紛紜輻輳而吾寂然不動之體固自若  
也海濶天高之體固自若也是故鳶飛戾天向上更  
有天在則向上更有心在鳶不得而飛也魚躍于淵



向下更有地在則向下更有心在魚不得而躍也長  
平之坑所坑者長平咸陽之火所火者咸陽漁陽之  
鼓所鼓者漁陽而長平咸陽魚陽之外上下東西南  
北相距不知其幾千萬里坑不得而溺火不得而焚  
鼓不得而震也人惟不認得宇宙之至靜卽吾心本  
來之至靜于是乎以軀殼爲心而不以宇宙爲心以  
一塊之知覺爲心而不以無聲無臭瑩徹無窮爲心  
則心已不勝其小亦蠢然一物而已矣苟能淡體而  
默契之則俯仰宇宙莫非真體通天徹地俱有實落  
千酬萬應無徃而非至靜瑩徹之地亦無徃而非行  
所無事從容中道之天所謂見大則心泰而軀殼之  
念窮通得喪死生榮辱之私自不得而沾惹於其間  
也專以此意理會似覺功夫畧有頭緒片段先生荅  
曰靜字只宜作定字明道先生云動亦定靜亦定無  
內外無將迎便不倚着一邊便不致踈脫駁雜矣餘  
所見甚開闊勉之勉之

達楚畹金邑侯啓

坦庵

維紫陽及龍眠雖隔一衣帶水而遡飲有源披木得  
幹先人衣冠藏焉

老父母化成四野政愜三江允望黃峯而北者罔不



深戴河流而矧拱以宇下之微勤天上之夢者乎  
南宮之役草草獲售而一官遠羈不能樞謁

龍光少伸下悃滌洄遡之脉脉之衷與第一峯白雲  
時往來座右也短楮不恭統希鑒亮

坦庵名拱乾字肅之治春秋中崇禎八辰進士庶

吉士

達諸父兄書

坦庵

維茲大布毓瑞鍾祥凡奕傳而及龍眠之麓披木有  
根殊切瞻戀先君子幾欲溯黃河之楫一問淵源而  
河山是阻時復勗予小子以母忘厥先也

拱不肖樗

材櫟質罔克負荷以我

祖宗之靈及諸父兄之蔭草草登南宮殊不足爲  
本支生色獨是遙企豐鎬瞻言葛藟神不禁僕僕往  
也特修短楮聊布鄙私一再歲中當覓差過里與諸  
父兄盡歡于白嶽第一峯也冗次不備曷任主臣

又



游踪倥偬雖未得沃領 萋藟餘芬而 諸父兄之  
雲誼殷殷皆心戴之矣頃偃卧秋山家叔君周孝廉  
告我以婺州之行家叔于不肖少共筆研竹林而金  
石盟者也千里來省廬舍計諸父兄見游子而欣然  
其能令家叔重而轉以重 先人者無煩不肖贅言  
也劉父母處更一函言之家叔于劉父母有至交蓋  
劉父母居桐久耳向聞有先墓事欲不肖料理者家  
叔可以代不肖矣山中草泐不及詳陳

劔浦祠堂上梁文

朴庵

伏以天象垂文聖人制禮七廟五廟三廟一廟廟有  
攸宜禘牲禘禘禘嘗禘蒸禘無不在去祧爲壇去壇  
爲墀漸遠所親緣葉尋枝緣枝尋根終原于一故祭  
則必合而祠則先營法與情俱禮繇義起瞻我方氏  
得姓最先仰惟雷公生民伊始四星克輔肅榆狄于  
黃宮七聖皆迷聯雲鏹于襄野師于之試元老歸周  
及錄之傳仙翁入漢逮乎宋室卜爾星居棗嶺誅茅  
睇三龜之習吉盈濱奠石憶一鶴之先臨派衍雲仍  
迢迢餘二十世代經元宋歷歷幾六百年甲第輝煌



簪纓不乏間闈密邇桑梓相望春祀秋嘗奉籩豆以  
無所祖功宗德慨水木之空懷旋馬之規廳事太隘  
綿叢之習野外何觀煬官啓孔聖之譏瘞主招唐虞  
之議粵瞻形勢載闢基圖架全屋于胸中匠心獨妙  
仍舊貫于谷口天意弗違勝事雲滃園葵拔公儀之  
手良材山合丘木回郢氏之斤檻倚廻潭看春濤之  
鯉躍棟連橫劔聽曉樹之鶯遷鳴峯峙其東弋峯卓  
其西峯峯爭出澗水瀦其右溪水迤其左水水皆廻  
周道平平夔龍期于接武孔墻屹屹繇賜得以入門  
燕雀避于下鳳凰鳳翼其承宇爰折衷于廷議豈作

室而道謀制創自今名稽往古同堂異室祖禰不混  
所棲右穆左昭子孫亦以爲序別姓收族考定範于  
東萊月會歲調尋芳踪于花樹聊歌卽偉用助郢麾  
梁之東 虹飛百尺捲西風首尾螭蜨霞影裏青雲  
直上隨雙龍

梁之西 橋下流水橋上蹊千蹊萬蹊同一道千水  
萬水歸前溪

梁之南 花明劔浦柳垂灣簾影參差翡翠起雲廻  
碧瓦鴛鴦還

梁之北 湖山萬里開群色春風桃李秋風桂不問



東阡與西陌

梁之上 長松欲架來新棟郭家富貴鄴侯書李杜  
文章光萬丈

梁之下 尋林遠伐羅之野紫栢香高主貌閑金猊  
半逐春風寫

伏願上梁之後詠螽羽于周南拾鳳毛于池上庭槐  
露洗分野色于東溪西溪官桂雲栽散天香于南院  
北院蛟峯鑑水期並足于鼎三韋曲杜陵瞻同天于  
尺五

朴庵名瓏字時振治書貢入太學任光州判

白石賦

爲許照氏贈

亦愚

亦愚溪叟白石山人邂逅乎烏有先生之里颯鬢承  
弁聯床並几屣屣起而徜徉相與觀乎無始等身名  
于浮漚齊天壽于殤綺天地萬物一馬一指羶蟻溷  
蠅群滅群起爰及化生悠然大視溪叟曰君何取于  
石也山人曰請言子之溪走將拏舟而遊焉溪叟曰  
僕溪大不過一掌而群景集焉爛乎躍如出之混混  
遵之衙衙崖青而渚白沙暖而潭虛浴鳧之與落鴈  
恒兩兩而乘居壁泉細而直下遙飈挹而手仇確長  
鳴于懸炬樓忽送乎夜書渙焉起穀澄矣鑿鬚吹沫



以汲東瀨而漁以辱于予故謂之愚山人曰走石則  
異于是天地網蘊萬物化生一牝一牡溪谷乃寧一  
君一如日月載明惟茲石也確然而示人以形崇聳  
若屏錯置若枰嶽崆嶷嶮嶮欲落欲橫霜崖縞以壁立  
類大玉之削成振河海而不洩拄天柱于萬齡東岱  
南衡西華北恆咸于茲焉是憑故曰一拳石之多與  
夫昭昭者而僉稱也歟溪叟曰豈惟石哉凡物則亦  
有然者願言其他山人曰太山之崇巖巖蔽魯巫峽  
之隘視天若畝如馬如象灑瀕許許懸之而爲呂梁  
裂之而爲啓母立阿防于三犀紀專攻于十鼓拾支  
機于乘槎閱飲羽于射虎蹲雙筍于益門列千龕于  
伊浦銅則留礦于吳山玉則抱璞于荆園爛歌于甯  
戚礪盟于漢祖蓋聞其語矣而莫之或覩也溪叟曰  
侈則侈矣而無所適于用也願進于是山人曰泗之  
浮浮梁之奕奕崑圃之玄江壁之赤座璞匿珉居之  
寂寂搜冥剔幽索之頽頽斲之鑿之窺理尋脉琢之  
磨之獻巧呈特鼎以養賢礪以威敵操臼以舂流磻  
以射九重之殿以砥以礪三級之階以平以城穹焉  
而爲碑貞可以刻曲焉而爲磬清可以擊五色煉而  
天補萬竹捷而河塞孔子曰君子不器請視斯石溪



叟曰美哉石之事悉矣未悉君之事願畢其說山人曰白者石之貞也石者土之精也白羽白雪惟體之輕石緇石黛惟貌之儔豈若茲白石稱予之情也哉堦之山中可倚可憑可卧可坐可以引觥朝夕見焉若莫逆之朋蓋將與之兪天地同死生是之取耳因以名吾亭乃歌曰白石兮粦粦左有石泉右有石田朝抱甕兮出汲夕扶犢兮與還又歌曰泉之楚楚田之膻膻我歌且謠我腹我鼓不識不知亦莫予敢侮歌已相揖而別各從所適溪叟返於溪山人歸乎白石

月樵賦贈邑侯朱父母

述庵

粵洪濛之嬪化兮海宇謐寧緊法象之效靈兮真宰冥冥惟彼太陰兮景耀千古夙稱貝闕兮寒氣嚴凝載魄載明兮受光於日其象爲坎兮與日代明當陽鳥兮西沉展水輪兮上昇照山河兮影動懸玉鏡兮熒熒掛長空兮似畫臨鳥鵲兮不驚齊晦朔兮離弦望順四序兮遊九行天之周兮遲讓日度之躔兮好從星其新生也宛轉若蛾眉其在望也團圞徹曉清玉兔伏兮長擣藥丹桂蟠兮秋銜馨是曰廣寒清虛之府中有娟娟嫦娥兮二八娉婷吸沆瀣兮靜修容



視曼

無音

回兮聽曼傾歛絳唇兮吻皓齒。璨綠鬟兮瞭

青睛。絢霓裳兮振羽衣。坐瑤宮兮倚雲屏。舞素鸞兮

瑤階下。奏仙曲兮品玉笙。君侯負高才兮抱疾足。遙

躡萬丈之雲梯。遠搏萬里之鵬程。鰲頭兮獨占。雁塔

兮驟登。

帝心兮簡在。大命兮是承。出宰兮百里。民社兮甫膺。

棲鸞鳳於枳棘。試牛刀於蚌城。韜工師之利器。培林

麓之芽萌。不斯桃李而闢草萊。不伐松栢而劓棘荆。

如春陽之一到。木欣欣以向榮。賦政優優兮剛不吐。

柔不茹。宅心藹藹兮賞疑重。罰疑輕。行追蹤兮太丘。

步接武兮朗陵。允矣黎元之父母。卓哉司牧之典刑。

邦之彥兮濡六載之丕績。詠以歌兮揚九叙之休聲。

移其所以宰一邑者宰天下。邇可遠在茲兮何有於

台平。薦剡交及。

宸聰番情。鼓寶瑟兮思更絃。育金鼎兮待調羹。冊書

一日下九天。攀轅難以繫金柅兮。河內空借寇而莫

能亂日月明兮。九霄道里兮迢迢。處江湖之遠而思

君兮其思也若焦。古之君子寄樵漁兮雲霞任逍遙。

君侯學而優兮年方饒。動葳器兮丹衷直攄佐。

熙朝披雲捧日兮燦若寒潭之皓魄。繡斧觀風兮母

...



自述

鑑泉

抱琴聊復問田廬野性偏宜水竹居茅屋春風三尺  
雪少年心事五車書故家簪笏嗟猶在用世文章媿  
不如擬向清秋尋舊約海天空濶厲行疎

賡程本中九日無菊

僻居村塢類荷嘉門外苔封一徑斜黃菊未開孤令  
節清樽欲泛欠時花何當往見鶴林女猶憶同煎桑  
苧茶青葢一枝聊自適滿頭欲插且賒賒

題三閭大夫廟

天地雖寬自不容空遊玄圃與閬風九章稱述平生



志千古難磨一字忠甘以此身投楚水耻隨三姓拜  
秦宮老農不識當時事特獻鷄豚祈歲豐

冬日課孫

仲冬天氣寒積日冰霜凜課孫居弊廬呵凍寒難忍  
負暄簷外坐誦讀良未穩旁人笑我癡胡爾精神損  
我念子孫愚不學益增蠢嗟彼富家兒細毳安夜寢  
紅日上三竿慵困未推枕詩書寧不讀黃金務多蘊  
黃金有時盡讀書修身本

郡志方伯鑑平盈人間學博洽至正間有司屢辟  
不起處林下環植竹木靜隔塵俗日與名士賡吟

狝峯先生以直諫奉

詔歸田

謹呈  
二詩

西峯

九霄雲翳鳳初翔蕉鹿無驚夢已忘萬死奄奄存一  
脉寸丹炳炳逼三光投簪不戀黃金屋結社何慚綠  
野堂祗恐青山留不住移文又見促曹裝  
苦口忠言不畏讒風裁砣砣柱狂瀾掛冠共惜頭還  
黑憂國從知心正丹春雨草堂圓謝夢薰風蘭畹試  
萊斑歸閒更渴蒼生望却訝東山卧未安

水月歌送聶大尹應臺選之京

君不見湘江水一泓到底無些滓我侯如水凜清風  
比屋樂萬絃歌裏又不見天心月銀河萬里環輝絜



我侯如月照花封膽破奸雄竦毛髮水兮長注東月  
兮長在空侯裝忽促應臺選安得借寇留青驄耄倪  
遮道淚難止生也題詩憂復喜願布餘波覆斯民願  
借餘光賁寒士棠陰月影動去思征帆水帶離聲悲  
何當建亭石刻此水月詞我侯我侯政績炳炳無終  
期

慵庵

爲舉人張拱辰外父題

西湖湖畔愛棲遲擾擾塵紛總不知日上黑甜歎客  
枕風高擘嘯傷魚磯田園有子隨分藝芰荷無官可  
製衣日日詩逋猶未了摩挲醉眼看殘碁

陽明居士評

句句寫出慵字辭意春淡

雲衢發軔卷

爲貢士王惟仁題

紅杏碧桃開已遍而君纔是出門時青雲莫道高如  
許脚步騰騰更讓誰

陽明居士評

有氣槩

月溪卷

爲歙邑張君瓊題

雲淡天開霽風微波自平梅梢照孤月太極寂無聲  
陽明居士評  
妙含道體是不可以頭巾氣目之

柳槿詞

勸君莫插楊柳枝枝弱芽黃媚春早瀟瀟一夜秋風



高不似松筠共長保

勸君莫插木樿花一開一落隨朝暮陽和育物本無私自是纖浮合先休

九日遺懷

謾驚塵世擾如麻共對佳辰興亦賒隨處口中羨丹桂何人眼底有黃花山尋高處卽成景心到樂時總是家却藐浮名開一笑不妨迤邐過溪涯

百年節序又重陽聚散于人亦匪常有酒拚隨今日醉無名省得一身忙嵐陰漠漠山初雨籬脚纍纍菊未霜正是兵戈多事日循環憂樂敢相忘

過釣臺

有此乾坤有此臺倚蓬無語重徘徊子陵不是忘君者出處憑誰史筆裁

自君之出矣

古樂府四首寓諷覽者當於言外得之

自君之出矣歲晚又梅花繁藻辦祠祀懸懸望抵家自君之出矣冷落小檠孤不爲陽臺夢寧忘嗣續圖自君之出矣有淚長如雨惟知江湖樂不念房幃苦自君之出矣家奴恣權寵伏膺雖日供大綱仗誰總

芙蓉

耿



照面秋江徹骨清蓬蒿叢裏見精英澹沾玉露非春  
媚冷拂金風向晚榮籬菊固知無異操谷蘭淡許可  
同盟高人倚岸垂青眼細認花神笑濯纓

奉和九日遣懷二律

和號節庵

佳辰休說事如麻共對山樽感興賒浮世浪驚新白  
髮此心偏解愛黃花登高不用尋陳跡紀勝還須羨  
作家寵辱兩忘渾似夢知幾元亦足生涯  
一樽隨興賞重陽佳會從知不可常陶徑花開曾有  
約卻林香在底須忙分明此夜杯中月絕勝他年靴  
上霜剛道先生天下望壯心未必與時忘

四言古詩

盤盤者湖

亦愚

盤盤者湖美程子也好士能文有高士之風焉

盤盤者湖於彼中壤程子來思雙綉五緗雙綉總總  
五緗如龍天宇其空出宛之東

盤盤者湖於彼中野程子來思騏弁駱馬騏弁縫纓  
駱馬鏤膺或友或朋望之若英

湖之清矣可以濯葛湖之平矣可以鑿髮鱸鮓發發  
載濡載沫迎思媵思程子泳思

直矣程子維邦之珍維蘭蕙爾衿維金玉爾音色爾



溫溫性爾存存載翕其情以濯爾心  
亶矣程子或頰或岸或張之絃或操之縵燕言衍衍  
晤言斷斷匪貌之恭膺背之胖

維時程子載遲之客載設之席伊何樂之載呼五白  
又何樂之載召百劇乃卜其夕

或繫之馬或續之炮或賦之詩于南于雅或奏之樂  
坎坎擊鼓于堂之下

孔子曰知命蘧曰知非知命則哲知非不違曰子維庶  
幾是瞻是依是以爲師爰用作歌用告我私

有梟

有梟刺暴也暴風行而上奪政下奪命矣

有梟有梟集彼園樹載煥其掌載振其羽左旋右翥  
其儀栩栩

有梟有梟集彼園屋載張其味載下其目左盼右啄  
其欲逐逐

飛鳥西來翛然邂逅奉首東窠以謂諸母母曰嗟予  
及矣寧汝弗顧

鳥投于懷如怨如怒仰喙永號以謂諸父父曰嗟予  
及矣寧汝之負

聽彼梟矣天厚其毒生則食母匪教之速鳴則殺人



匪性之穀

瞻彼梟矣天亟其誅厥惟日至投首於虞爰瘳其惡  
懸之南株

維蛇有毒旋斃其腹維虎有威卒寢其皮維人之無  
良其何以臧如彼廣牡薄棲於朽如彼膠舟漾於中  
流

五言古詩

黃雀吟

鴛鴦長宿水鷓鴣恣雲遊萬物貴得所寧論沉與浮  
弱肉強之食先賢有隱憂玄蟬號高樹于物本無求  
螳螂伺其下相持如有讐黃雀西南來群鳴啄高丘  
方收漁人利北顧見張侯蛇弓懸兩臂取笑黃金投  
紛披林鶻疾迸落天花浮青絲繫馬後纍纍歷韋鞦  
歡娛未終畢談笑生禍尤殺身禁庭裏喋血城門樓  
蓮花萎白日菱葉暗長秋天道自好還世情故悠悠  
已矣東門泣何如北里謳



出門

出門方一笑一笑吾將歸世路多反覆故園無是非  
出門方一笑一笑拂衣起去去勿復言欲言誰與理  
出門方一笑一笑從兩狼自古重去國仲尼亦皇皇  
出門方一笑一笑前儔發攬轡且躊躇斯須立明月  
水開川磷磷倚棹下天津杳杳反南路悠悠看北辰  
我帆日以進我抱日以新朝拂呂梁石夕舉清江蘋  
紫山忽在眼瓜口多逢人利涉輕揚子懷賢逗富春  
捨舟尋谷道理策登嶙峋過嶺還初服入溪洗行塵  
老妻候我門稚子迎我隣童僕滿墻頭相睇還相親  
謁謁樓前山依然成友賓筦爾復一笑一笑天地春  
再同游大行讓溪震得登慈仁閣

昨遊見諸佛今遊見諸佛百佛同一身一身原無物  
形骸土木非色相粉黛假鍾梵響長空冠裳走其下  
禍階卯金氏千載陷祝髮枯骨起春風潮陽舟夕發  
我來亦冥冥問佛佛不語相對兩茫然振衣下閣去  
再同汪內翰中山雲程登慈仁閣

高構似嶽崆屢登殊未倦曠哉千里心太皓同游演  
黃金冥秋草想像瑤池宴青鳥來不來空中去如電  
偶同靜者言遂釋紫宮戀落日在西山餘光照我面



忽然退孤岑黯黯回郊甸秉燭須夜遊明朝畏中變

孝節手卷

爲族孫元憲母胡氏題

夫死在萬里妾身如晝燭驚風吹素幃起抱明月哭  
水逝不歸池葉落不返枝君看膝下兒是妾未死時

關山月

戍樓盡角悲關山月出遲行人在萬里歸鴈向南飛

江南曲

江水夜夜流江花紅蹙蹙年年江上住慣唱江南曲

折柳詞

三首

爲君折楊柳須折最高枝低枝春尚淺高枝有黃鸝

爲君折楊柳切莫傷柳眼柳眼看行人此恨應無限  
爲君折楊柳莫折楊柳花到手隨風起飄蕩不歸家

七言古詩

登瀛別約手卷送獅峯戴先生歸翰林

獅峯彷彿如峩眉靈秀幻出英雄兒東坡穎濱邈已  
矣君家伯仲能追隨先生曾次貫星斗揮毫落紙龍  
蛇走有如大劔吐光芒真可斫斷蛟鼉首十五氣欲  
吞全牛二十聲價雄南州陸機綴文何足數小范未  
達先懷憂文場鏖戰十年餘一經品題收佳譽飛黃  
不日見騰踏顧彼同輩猶蟾蜍君門射策才縱橫玉



殿臚唱沾恩榮詔入館閣試詞賦列官翰苑同登瀛  
瀛洲遙在五雲裏東繞玉河如弱水就中果是神仙  
窟凡骨伊誰能到此去年腸斷鸞影空納疏陳情辭  
帝宮歸來賸有庭闈樂袍錦照耀春花紅蹇予垂翅  
回溪上幸附冥鴻同俯仰坐挹春風兩月餘無限襟  
懷慰淡想九重前席應久虛玉堂風月還如初雙親  
更喜鬢猶漆先生安得念吾廬秋風八月天氣新鴈  
聲雲影連江津輕帆一日棹千里觀者共羨瀛洲人  
親交預賦詩篇送別約餘情兩珍重功名唾手志已  
遂要與官家作梁棟臨期回首謝諸君願看接武登  
青雲多賢簪盍京闕下握手重叙盟斯文我見登瀛  
去有期也賦登瀛送別詩瀛洲別晤當何日一枝春  
雨杏花時

爆竹

老人惜日愁日換一日分作兩日看倚聽庭前爆竹  
聲小兒拍手老人驚百年轉眼如奔電李耳彭鏗今  
不見昨宵夢見莊漆園遺我逍遙齊物篇天地萬物  
皆如幻達人觀休永嘆

白苧詞

為族孫元憲母節婦胡氏題

刀頭暗折破鏡飛驚風吹地天欲歆花燭無光霾兩



帷栢舟調急商羽疑翻出新聲白苧詞白苧初縫澁  
滿指春風遙寄燕城裏衣到招魂招不起相將燒向  
溝頭水長征馬歌舞鸞藏羅裙牢繫雙明璫明璫轉  
躍裙帶長與我同埋送高岡彩旗簇簇傳呼急天使  
抱詔堦前立下堦再拜翻成泣

賀別駕侄純仁六秩七韻

東帶兮愁人盍把兮松筠紫虬蹶泥避蛙黽白鷗浩  
蕩誰能馴青鳥兮同翻白雲兮與還黃花炫晝梅編  
夜兩兩短屐雙長鏡紫宮兮戀釋進酒兮呼白似夜  
不夜將雨天半醒半醉欲眠客解衣兮晝寢還推兮  
半枕東風吹酒醒未醒已而殆而君莫問碧梧兮如  
雲萬顆兮珠勺安得凡材擲天外還移此本樹君門  
乾坤兮一亭雙鳥兮空吻張燈轉使飛蛾密願揭日  
月中天行周程張朱邈已矣萬千蚊蚋城復起德性  
學問同一機爭持正印向誰是

易水寒

易水寒歌聲酸曲終調變髮衝冠意氣相許堅如磐  
短刃欲碎秦王肝建餓松栢懷八關七首不行燕亦  
殘王負劍王負劍統在團團事口尖刺王不中空血  
濺







壯士衰黃鳥妖書泣白蓮世情終汨沒回首淚潸然  
秋夕

落日光已夕涼風來晚秋村虛鍾叩月山黑火啄牛  
鴻城遠岑眼砧生別戶愁空懷玉粲恨長嘯欲登樓  
蜂採花

兩歇西園爽蜂從園裏來雙鬚浮玉筍兩股注金罍  
薄取花那覺勤釀蜜已醅豈爲飽腹計待爾急時開  
花被蜂採

春風花亂發照我園林奇寧受千蜂過不堪一霧隨  
花殘仍結子根仆無留枝所以種花者祛害如决疽

七言律詩

樵谷次奉李大巡中溪元陽

驄馬朱衣拂紫冥石門斜度遶雲屏旌旗日抱雙龍  
上巖谷風聞一虎經林鳥畏人啼向屋山花迎客笑  
臨肩使星昨夜輝牛斗誤認張華劍氣騰

賀地卿邦慶姪孫四十

南極輝輝當戶垂皇華之使天上歸一樽笑酌白雲  
下六繡行驕綠柳時碧斫千年雙藕脆黃持半殼雪  
螯肥山林掃迹無長物何以贈君雙玉芝

北士賀壽



八月秋風桂影勻年年此日一番新從今百歲眼前  
事又是一般天上人醉去無心真自在老來有髮更  
精神鬚眉不似元君老若比而翁瘦幾分

桑垆集觀河乘舟至湖家橋

野望荒茫夕照前飛鴉盡處見炊烟菰蒲葉暗鴈將  
下桑柘條稀蠶未眠兩部當階喧夜月一軒鳴雨漾  
春船偶來擊汰中流坐天上真如碧漢懸

九日登玉峯吹葵園韻 一首

雨放初晴灑氣高重尋芳約暫閑勞眼前世事憑杯  
酒鏡裏流年任鬢毛鄙句不堪酬勝節黃花只好向

種竹

帶笋移栽數寸黃亂穿虎豹刷琳瑯初翻紫蒂亂  
礫謾削青梢燕尾長鳴鳳西來白鶴歸洛賓鴻南去  
瀟湘春風漸看龍孫長高臥一竿翠輦墮

哭

孝宗敬皇帝

一十八年施雨澤百主萬劫成靈威祖宗家法恒遵  
守夷夏人情熟登違法罷朝影墜詔來花縣石  
音希小臣欲哭嗟無路淚澆其處無從辨



迴文

殘雲亂落半林煙  
窈窕寒香未雨披  
連瀾倒逐風飄北  
海月明伴客過南川  
山橫鴈處愁腸斷  
水落花時野興遄  
關日一天清暑好  
澄江醉罷聽猿玄

五言絕句

咏懷

風恬園蝶翻  
雨過巖花白  
出戶欲鳴禽  
前溪忽已夕

舉杯對明月

舉杯對明月  
和月都吞了  
杯乾月亦沒  
我醉天欲曉

秋扇

夏至愛君繫  
秋至將君撇  
主人太無情  
君亦附炎熱

雪獅

雖無咆哮雄  
已作跳梁勢  
移汝住冰山  
一時俱消殞

六言絕句



自述

爲仁須當盡已處事要可告人窮經必將致用精義  
所以入神

七言絕句

漂母詞

拜將登壇一世驚不如老嫗眼中青淮陰城下溪頭  
水風靜猶聞漂布聲

巨氣

松陰露洗月華孤野霧閑雲一抹無半點靈臺清似  
水直從此處見真吾

梅花

昨夜江風霜滿枝盤中粒粒巧相如許多生意纔收  
拾又被梅花笑破之

題扇面小景

臺榭荒涼野水濱菰蒲榛莽一時新濟川舟子來何  
晚愁殺中流擊楫人

道人立傍青松下雙眼空空隘八荒到手一條筇竹  
杖時挑造物入行藏

詞

好事近

慶希玉潘先生擢香山尹



解得圓腰帶今朝頓覺精神馬上春風自語好整頓  
經綸一隅暫借試甘霖南海慶同雲竚看更明犬  
靜卧月影槐陰

賀新郎

慶侄孫邦慶得捷

宇淨流焱歇見亂吹過雲沸日錦屏山列報說道郎  
君歸也爭走辯毛堆髻道人是風流又別雙花壓鬢  
絲重結笑定老曾東塗西抹這步武喜相接 桃溪  
炫赫人爭說憶澹翁裒然甲榜首登天闕後來諸彥  
聯愧棘奕世簪纓不絕俺方溪謬稱佳麗地氣南來  
山色改文運轉如江河始决前浪推後浪疊

題東山

時素

昔聞湖海士宇宙一腔春我來歲云暮風霜肅寒林  
駕鶴南海途遙憶管鮑親誰知湖東境有客超凡倫  
長嘯娛東山闢戶寘嘉賓適予賣藥去依稀偶相尋  
一見開歡顏梅花獻天心再見出肺腑風鳥和鸞音  
三見羲堯忘碧漢生祥雲沃我無懷味酌我葛天樽  
携我東山巔五奏南風琴極目觀扶桑醉舞盡日燠  
嗟彼洛陽花莫如東山森桃李萬叢茂蘭香十里聞  
嗟彼長安調莫如東山韻黃鐘與大呂穆穆聲更渾  
嗟彼螢螢焰莫如東山溫朝曦普空宇百卉含芳芬



我愛東山廬感慨成沉吟期我尼父登大塊爲崑崙  
出門回首望壁立古乾坤

壽泉翁夫子榮登八表

羲文千古道誰存五百昌期應運真心性堂中觀太  
極總箴幾上會員神南雍化雨菁莪綠督府雲雷帝  
範新天佑臯夔長世教南山萬仞鎮千春

新春

天風送晚玉門東大海瑤光映日紅萬室香烟祝聖  
賀千山雲靄歛長空神遊碧漢觀儀鳳志入先天喚  
卧龍舉筆吟春春更早梅花枝上獻東風

過閔子廟有感

巍巍廟宇角崢嶸千古人稱孝子庭深愛豈從園外  
得良知只在性中成非公有意求無間造化疑真却  
露形百世聞風何處學一心無欲順天行

福山贈別

君來福山何懌懌君去福山何惻惻福山有月懸空  
碧無今無古無南北採薇採薇何遲遲無味餞君  
何嗟咨福山有月懸碧虛願君惟帶明月歸

春客王十嶽丈隱園索題紅梅

時文名珙

踏雪水雲隈名園對早梅紅霞開滿樹白帙又重來



疎影橫窓月清香送酒杯登堂未得句和靖與裴徊  
苦雨

雨因行月令連日夏雲浮不斷班鳩喚那知杜宇愁  
西疇農問稼古渡岸橫舟獨坐書齋悟松篁灑自幽  
贈止觀上人

僧來自市城邂逅覺神清未與平生遇真如故舊情  
玄珠含正觀智海湛虛明何日參禪旨一聞鐘磬聲  
九日自郡城重訪十岳丈渡煙村至玉潭

經年跼市塵九日復煙濱幽身仍依舊高人獨任真  
黃花開逕滿綠酒送杯頻醉酌東籬下歡然欲託隣

春仲七日紀年隱園

浮世輪花甲雲踪駐輞川青春依舊好皓首始談禪  
最喜沙鷗狎仍逢社燕還漸諳玄妙理聞見總忘筌  
懷默照亭一首寓隱園作

一畝村西地溪山愜隱情達觀塵世夢常對白雲生  
獨鶴棲松定芳蘭飲露清倚梅通塵徑乘月與時行  
秋訪江湖隱丈挂笠亭

秋訪桃源隱幽清勝槩多小亭常挂笠醉舞不停簑  
園灌鷗忘我竿投艇泛波月明黃菊逕談劍日來過  
寄心印上人理源庵



卓錫已云久誰尋大士場繩床忘就卧齋竈欲休糧  
功德還披偈爐烟不斷香空雲飛片片隨處是西方  
次少乾遊石門庵韻

嘉朋尋理源清風拂蘿徑燥烈負秋陽一入石門靜  
端坐悟玄元心如徹明鏡塵居不染塵性定見真性  
心印問何從玄關自能證今夕借繩床同聞響鐘磬

王潭戲釣

王潭淡千尺釣鰲把一竿浩歌風月古東望是嚴灘

元宵翫燈

季泉

雲徹中天皓月生燈光直映古人情無窮燦燦河流  
派渾是團團太極星莫道畫工寓妙筆分明造化露  
真形師尊點首燈花茂漸覺空中意味清

點周禮有感

昨夜送客抱琴去歸來研硃點周句風送玉聲隔樓  
闌月來正出扶桑樹今朝擁衾坐虛室好鳥數聲枝  
頭立天機自在君不知周公與爾相依稀

季泉名可慶治書中嘉靖辛酉鄉試浙川縣知縣

夢月宮

述庵



庭前昨夜金風起夢入廣寒月宮裏洞簫驚入紫雲  
回八萬二千次第開燦燦爛爛河橋星軫軫札札擣  
藥聲月裏嫦娥對吾語可憐夜夜常孤處行遍月宮  
清夢覺南村北村雨初落

梅月圖

平生最愛梅與月清白人間占竒絕清如無雲之太  
虛白若無瑕之玉潔長有流光照古今獨存勁氣凌  
霜雪不緇不濁永不磨敵破群邪走妖孽

予以謫陋瞻禮宗祊荷

諸父兄之隆情並

中翰兄之寵顧遂以百億世水木之鄉恰逢

八千歲春秋之日欣茲嘉慶敬效俚言非曰能詩

聊同華祝

桐國祥長發星源澤本隆繁葛藟自庇維桑梓必恭  
敬舍瞻喬木新豐說大宗質朴杜陵句詩書闕里風  
祖功嚴伏臘後進畏終童戀

玉心嘗北傳家道已東瑞占麟振翰染鳳池中享  
予慚敝帚似爾盡良弓盛德應三祝高情感百朋永



... 卷之四 ...

... 卷之四 ...

... 卷之四 ...

... 卷之四 ...

... 卷之四 ...

... 卷之四 ...

... 卷之四 ...

... 卷之四 ...

... 卷之四 ...

... 卷之四 ...





